



Aqqalu C. Jerimiassen

UKA 2025/63-1

Atassut

15. Oktober 2025

Paasissutissanik qarasaasiatigut suliarinnittarfinnik angisuunik Kalaallit Nunaannut inissiinissaq nunani tamalaani ingerlatseqatigiiffinnut pilerinartunngortinniarlugu naalakkersuinikkut suliniutinik sunik aallartitsisoqarsinnaanera pillugu Naalakkersuisut nassuiaasioqqullugit peqquneqarnissaannik Inatsisartut aalajangiiffigisassaattut siunnersuut. Nassuiaat 1. januar 2027-utinnagu Inatsisartunut agguanneqassaaq.

(Inatsisartunut ilaasortaq Jørgen Rosbach, Demokraatit)

Aningaasarsiorfissat nutaat tamaasa tikilluaqqulluinnarpagut!

Taanna eqqarsartariuseq tassa tamaarsuullugu ingerlattariaqagarput, siunissarput qaamanerusoq eqqartortuartillugutigu aningaasarsiornissarli tikitsillu naaggaallaqqissusersuarput pilaarsallaqqissusersuarpulluunniit ilikartittariaqalivipparput.

Qujanaqaarli maanna taamatut siunnersuuteqartoqaqqimmat, tassami ukiut siuliini takusareerparput ima ittut siunnersuutaasarsimasut ukiut qulit sinnilaarlugit kingumut qivialaaraanni, taamanersuarniilli datacenterinik pilersitsisinnaanissamut qammaasinnaanerit eqqartorneqartarsimagaluartut, eqqarsartariaatsikkulli kingusissimanerujussuup malittaannittaag aallunneqartarsimanngitsut.

Ima eqqarsartaaseq ajoraluartumik ukiorpassuarni kisaqqasimatigaaq, tasersuit piusut nukissamik ataavartumik annertuupilussuarmik tunniussaqaarsinnaasut qulaavillugit qulaarlugit misissoqqissaarneqarneranik suliffeqarfiit soqutiginnittut ingerlataqartarsimapput.

Uagulli susimavugut? Pinngortitarsuarput iluatigiummiallaataajaasiit paasinngiivillugu qanoq atungarissaarnikkut annertutigisumik kivitsiumaarnersoq qiviaqqaallannguarnagu aataqqiitta ilaat tassani immaqa tupertarsimammat iluatissarnersuaq piusarluni.

Taanna eqqarsartaaseq qimalaarniartigu inuiaqatigiittut atungarissaarnikkut siuariartoqqikkusukkutta, kanngilluata atukkagullu ajoreqalugit, aningaasaliiniarlutik ummuisimaannartut tikilikassappata sukanerpaaq atorlugu tatamisikkusuummertarneri ila qimaamilaartigu!

Taamaattumik tupinnarneq ajorpoq, ukiorpassuarni Atassummi inatsisartuni ilaasortaattitarisimasarput, taamatuttaarlu Maniitsup kommunerisimasaani borgmesteriusimasoq "Aataqqii" Siverth K. Heilmann Tasersiamut Tarsartuullu tasersuanut tuungatillugu uummateqarfigilluinnarlugit sukataaruteqartuartsimagaluarmat, kinguarsarneqagaaramilli naggataani asiunnartunik.

Tassani annerusumik Alcoa aluminiumik aatsitsivinnik sanaartornissaminut periarfissanik ujaasisimagaluarnera, atungarissaarnerunermik tunniussaqaagaarsinnaagaluag, tupinnanngitsumik sulii ulloq



manna tikillugu inuttaata eqqartortuarpaa uggoralugu, suliaq taamak angitigisoq asiunnartinneqarnikummat kinguarsarsimanerujussuup pianik.

Tassami Islandimi Alcoap suliffeqarfissua qiviaannaraanni, takornariaqarnikkut isaatitsinerujussuamik tarassataarutigisaraluaqalugu suliffeqarferujussuarnik Alcoatut ittunik nunaminnut tikisitsisimanertik aningaasarsiornikkut ukiumut avataaniit kaaviaartitsinerannut 70%-imut inissisimasoq takuneqarsinnaammat, aali illuani aalisarnikkut uagutsinniittaaq isaatitsineroreersut, qaavatigut suliffeqarfissuit qarasaasianut allanullu attuumassuteqartut nunaminni qaloorivigaat.

Uinniarta ullumikkumiit, maani inersuarmi aataqqiip eqqartortuarsimasaasa anersaavat nangillugu.

Naalakkersuisut akissuteqaataanni nuannerpoq takusinnaallugu, suliat tassa kiisami pimoorullugit aallarnisalerneqarsimasut, sulilu sukkatsiallaqqissinnaaneriniilluunniit kaammattuiinnarsinnaavugut, Atassutip aningaasarsiornikkut suliniutigisarnikuusimasarpassuisa sikkeralersut ukiorpassuarnik siuarsimasimallutik piusimasut ersiutigilluagaasa ilaagiligaat tassa nuisalerput, qujanarpoq!

Naalakkersuisut taamaattumik Atassummiit taperserpagut, siunnersuuteqartumullu qujalluta.